

Tolerancija i nada će prevladati



Velikodušnost, solidarnost, suosjećajnost, tolerancija i nada, koji su uvijek bili dio bosanskohercegovačkog društva, prevladat će nad zlobom i očajem, rekao je visoki predstavnik i specijalni predstavnik EU Valentin Inzko danas na ceremoniji na Prokoškom jezeru u povodu obilježavanja dvanaeste godišnjice helikopterske nesreće u kojoj je više pripadnika UN-a i OHR-a izgubilo život.

“Na ovoj planini je poginulo dvanaest ljudi da pejzaž nade ne bi bio uništen”, rekao je visoki predstavnik i specijalni predstavnik EU. “E, pa i nije uništen, niti će biti uništen, jer ljudi u Bosni i Hercegovini imaju bogomdanu snagu i mudrost koja prevazilazi ograničenja njihovog političkog sistema i političkog liderstva”.

“Pejzaž duše ove zemlje prožima ljubav, a ne mržnja, nadahnjuje ga velikodušnost, a ne zloba, održava ga nada i ne uništava ga očaj. Ta činjenica se pokazala istinitom čak i u dvije protekle užasne decenije: politički i moralno nekompetentni ljudi koji su pokrenuli i proveli nasilje pokušali su svesti većinu građana na sopstveni nivo i u toj su nakani upadljivo doživjeli neuspjeh”, rekao je visoki predstavnik i specijalni predstavnik EU.

“Dobro će prevladati. U to sam siguran”, zaključio je on. “Sa ove planine odlazimo sa obnovljenom vjerom da će suosjećanje, tolerancija i ljubav trijumfovati – i u najgorim okolnostima, kada se čini da su glupost i sopstveni interes prevagnuli, mi

ćemo pogledati naš unutrašnji pejzaž i vidjet ćemo da je snaga dobra, kao što je uvijek bila i uvijek će biti, veća od snage zla.”

Integralni tekst obraćanja visokog predstavnika i specijalnog predstavnika EU dostupan je [ovdje](#).